

Зуҳо (чошгоҳ) намози ва уни ўқиш тартиби



12:30 / 17.07.2021 22016

Номланиши: Зуҳо намози манбаларда турли номлар билан зикр қилинган бўлиб, кўпроқ “Ишроқ намози”, “Шуруқ намози”, “Аввобийн намози” ва “Чошгоҳ намози” деб юртилади.

Хукми: Зуҳо намозини адо этиш нафл амал саналади. Нафл деб, кишини ўз ихтиёри билан фарзга қўшимча тарзда бажарадиган амалига айтилади. Яъни, Зуҳо намози – бир кунда беш маҳал адо этилиши мажбурий бўлган фарз намозларини тўлдирувчи, ихтиёрий суратда адо этилса, улкан савоб бўладиган намоз ҳисобланади.

Вақти:

- Бу намознинг вақти қуёш бир найза бўйи кўтарилганда, яъни қуёш чиққандан тахминан 20 дақиқа кейин бошланади.

- Охирги вақти эса кун тиккага келган вақтдан бир соат аввалги вақтгача ҳисобланади. Ушбу икки вақт оралиғида Зуҳро намозини адо этиш мумкин.

Ракатлари сони: Зуҳро намози икки ракатдан саккиз ракатгача ўқиш мумкин. Энг афзали тўрт ракатдан ўқишдир. Чунки Расулуллоҳ саллаллоҳу алайҳи васаллам кўпроқ тўрт ракатдан ўқиганлари Оиша разияллоҳу анҳудан нақл қилинган. Зуҳро намозида маълум сураларни ўқиш шарт қилинмаган. Ушбу намоз овоз чиқармасдан махфий, ёлғиз ҳолатда ўқилади

Фазилати: Зуҳро намозининг фазилатига доир кўплаб ҳадиси шарифлар ворид бўлган. Жумладан, Муоз ибн Анас ал-Жуханий разияллоҳу анҳудан ривоят қилинади: “Расулуллоҳ саллаллоҳу алайҳи васаллам: *“Ким бомдод намозини ўқиб бўлганидан кейин намоз ўқиган жойида то зуҳро намозини ўқигунча ўтирса, фақат яхшилиқдан бошқани гапирмаган бўлса, унинг хатолари, агар денгиз кўпигидан кўп бўлса ҳам мағфират қилинади”*, деганлар” (Имом Абу Довуд ва Имом Термизий ривоятлари).

Абу Ҳурайра разияллоҳу анҳудан ривоят қилинади: “Расулуллоҳ саллаллоҳу алайҳи васаллам: *“Ким зуҳро намозини бардавом ўқиса, унинг гуноҳлари денгиз кўпигича бўлса ҳам мағфират қилинади”*, дедилар” (Имом Термизий ривоятлари).

Абу Зар розияллоҳу анҳудан ривоят қилинади: *“Расулуллоҳ саллаллоҳу алайҳи васаллам: “Сизларнинг ҳар бир аъзоингизга садақа вожибдир. Ҳар бир тасбиҳингиз – садақа, ҳар бир ҳамд айтишингиз – садақа, ҳар бир таҳлилингиз (“Ла илаҳа иллаллоҳ”, дейишингиз) – садақа, ҳар бир такбирингиз – садақа, яхшилиқка буюришингиз – садақа, ёмонликдан қайтаришингиз – садақа. Энди буларнинг ҳаммаси учун икки ракат зуҳро намозини ўқишингиз кифоядир”*, - дедилар (Имом Муслим ривоятлари)

Зуҳро намозини ўқиш тартиби:

Намозга киришиш:

- Намозни бошлашдан аввал қуйидагича ният қилинади: *“Тўрт ракат зуҳро намозини холис Аллоҳ учун ўқишни ният қилдим”*.

- Кейин икки қўлни қулоқнинг юмшоқ жойига олиб бориб, *“Аллоҳу акбар”* деб намозга кирилади.

- Кейин қўллар туширилиб, киндик остида боғланади.

Биринчи ракат:

- Қўллар боғлангандан кейин қуйидаги “Сано” дуосини ўқийди: *“Субҳаанакаллоҳумма вабиҳамдика ватабааро касмука ватаъаалаа жаддука валаа илааҳа ғойрук”*.
- Сўнг “Аъзу” ва “Бисмиллаҳ”ни айтиб, “Фотиҳа” сурасини ўқийди.
- Кейин “омийн” дейди.
- Сўнгра ўзи яхши билган бир сурани зам сура сифатида ўқийди.
- Кейин “Аллоҳу акбар” деб, руку қилади.
- Рукуда уч марта *“Субҳаана роббиял ъазим”*, дейилади.
- Сўнгра *“Самиъаллоҳу лиман ҳамидаҳ”*, деб бошини рукудан кўтариб, яна тик туради.
- Кейин *“Роббанаа лакал ҳамд”*, деб бироз тик туради
- Кейин “Аллоҳу акбар” деб саждага боради. Саждада уч марта *“Субҳана роббиял аълаа”*, дейди.
- Саждадан “Аллоҳу акбар” деб қайтиб, хотиржам ҳолатда, қўлларини сонини устига қўйиб ўтиради
- Кейин яна “Аллоҳу акбар” деб яна бир марта сажда қилади. Унда ҳам уч марта *“Субҳана роббиял аълаа”*ни айтади.

Кейин “Аллоҳу акбар” деб иккинчи ракатга туради.

Иккинчи ракат:

- Иккинчи ракат ҳам биринчиси каби бўлади. Фақатгина иккинчи ракатда *“Сано”* ўқилмайди, *“Аъзу”* айтилмайди.
- Намозхон иккинчи ракатда икки марта сажда қилиб бўлгандан кейин ўтиради ва *“Аттаҳийят”* дуосини ўқийди.
- Кейин “Аллоҳу акбар” деб учинчи ракатга туради.

Учинчи ракат:

- Учинчи ракатда иккинчи ракатда нима қилган бўлса шуни бажаради.

- Учинчи ракатнинг икки марта саждасидан кейин ўтирмасдан тўртинчи ракатга туради.

Тўртинчи ракат:

- Тўртинчи ракатда учинчи ракатда нима қилган бўлса, шуни қилади.

- Тўртинчи ракатнинг икки саждасини бажаргандан кейин ўтиради ва *“Аттаҳийят”* дуосини ўқийди.

- Кейин *“Аллоҳумма соли ъало...”* ва *“Аллоҳумма борик ъало...”* салавотларини ўқийди.

- Мазкур икки салавотдан кейин *“Аллоҳумма мағфирли...”* ёки *“Роббанаа аатинаа фид дуня...”* дуоларидан бирини ўқийди.

- Кейин аввал ўнг елкасига қараб, *“Ассаламу алайкум ва роҳматуллоҳ”* деб салом беради.

- Кейин чап елкасига қараб *“Ассаламу алайкум ва роҳматуллоҳ”*, деб салом беради.

Шу билан тўрт ракатли зуҳо намози адо этилган ҳисобланади.

Ўзбекистон мусулмонлари идораси Фатво ҳайъати